

**JU UNIVERZITET U ZENICI**

P R A V I L N I K O RADU VIJEĆA STUDIJSKOG PROGRAMA NA UNIVERZITETU U ZENICI

Zenica, juni 2026. godine

Na osnovu člana 56. stav (2) tačka d) Zakona o visokom obrazovanju („Službene novine Zeničko-dobojskog kantona”, broj: 12/22, 15/2024-autentično tumačenje, 5/2025 i 12/2026), člana 67. stav (2) tačka d) Statuta Univerziteta u Zenici (prečišćeni tekst), Senat Univerziteta u Zenici na 04. vanrednoj sjednici održanoj 24.06.2026. godine donio je

P R A V I L N I K O RADU VIJEĆA STUDIJSKOG PROGRAMA NA UNIVERZITETU U ZENICI

POGLAVLJE I. predmet Pravilnika

Član 1.

(Predmet Pravilnika)

Pravilnikom o radu Vijeća studijskog programa na Univerzitetu u Zenici (u daljem tekstu: Pravilnik o Vijeću) bliže se uređuju organizacija i rad Vijeća studijskog programa (u daljem tekstu: Vijeće), kao i rad šefa studijskog programa prvog i drugog ciklusa studija na Univerzitetu u Zenici (u daljem tekstu: Univerzitet). Pravilnik o Vijeću utvrđuje kriterije za uspostavljanje Vijeća, kao i druga pitanja od značaja za organizaciju i rad Vijeća u skladu sa Zakonom o visokom obrazovanju („Službene novine Zeničko-dobojskog kantona”, broj: 12/22, 15/2024-autentično tumačenje i 5/2025) i Statutom Univerziteta.

Član 2.

(Sadržaj Pravilnika o Vijeću)

- (1) Pravilnik o Vijeću sadrži odredbe kojima se bliže i detaljnije uređuje:
 - a.) definicija osnovnih pojmova;
 - b.) kriteriji za uspostavljanje Vijeća;
 - c.) organizacija i sastav Vijeća;
 - d.) nadležnosti Vijeća;
 - e.) sjednice Vijeća;
 - f.) zadaci i aktivnosti šefa studijskog programa.
- (2) Pravilnik o Vijeću, s elementima iz prethodnog stava, donosi Senat Univerziteta na prijedlog Odbora za kvalitet Univerziteta.

Član 3.

(Osnovni pojmovi)

U ovom Pravilniku su u upotrebi pojmovi sa sljedećim značenjem:

- a.) studij (studiranje) je proces definisan nastavnim planom i programom u kojem student pohađa utvrđeni studijski program prvog, drugog ili trećeg ciklusa na licenciranoj i akreditovanoj visokoškolskoj ustanovi, a nakon čijeg uspješnog završetka student stiče pravo na akademsku titulu odnosno određeno zvanje;
- b.) studijski program je skup obaveznih i izbornih nastavnih cjelina (predmeta) jednog ciklusa studija, čijim se savladavanjem stiču kompetencije, postižu zadati ciljevi i ishodi učenja, te stiče pravo na akademsku titulu odnosno određeno zvanje;

- c.) nastavni plan i program - uređen skup predmeta i njihovog sadržaja. Nastavnim planom utvrđuju se nastavni predmeti, ukupan broj časova predavanja, vježbi i drugih oblika nastavnog rada. Nastavnim programom utvrđuje se sadržaj nastavnog predmeta, način izvođenja nastave i polaganja ispita i drugih vidova provjere znanja, obavezni udžbenici, priručnici i druga obavezna literatura na osnovu kojih se polaže ispit iz tog nastavnog predmeta.

POGLAVLJE II. Vijeće studijskog programa

Član 4.

(Organizacija Vijeća)

- (1) Na univerzitetu/fakultetima/akademijama, na kojima se nastavni proces realizuje putem studijskih programa, može se konstituisati vijeće studijskog programa, kao stručni organ.
- (2) Kada se radi o srodnim studijskim programima, postoji mogućnost konstituisanja zajedničkog vijeća studijskog programa.
- (3) Odluku o konstituisanju vijeća studijskog programa, u smislu st. (1) i (2), donosi NNV/UNV fakulteta/akademije, uz prethodno pribavljeno mišljenje Senata Univerziteta, a za univerzitetske studijske programe odluku donosi Senat Univerziteta.

Član 5.

(Sastav Vijeća)

- (1) Vijeće čine svi nastavnici i određen broj saradnika, koji su u radnom odnosu na Univerzitetu, a koji učestvuju u realizaciji nastave na studijskim programima, osim onih koji nastavu izvode na općim univerzitetskim izbornim predmetima, te predstavnici studenata iz sva tri ciklusa studija koje imenuju odgovarajuće studentske organizacije.
- (2) Broj članova Vijeća iz redova saradnika i studenata, kao i način njihovog izbora, utvrđuje se odlukom NNV/UNV-a fakulteta/akademije, shodno stavu (3) prethodnog člana.
- (3) Članove Vijeća iz stava (1) imenuje NNV/UNV fakulteta/akademije na početku svake akademske godine.
- (4) Sjednicama Vijeća prisustvuje i sekretar fakulteta.
- (5) Način rada Vijeća bit će uređen poslovníkom o radu, kojeg donosi Vijeće, na prvoj konstituirajućoj sjednici.

Član 6.

(Kriteriji za konstituisanje Vijeća)

- (1) Vijeće se može konstituisati ako je na studijskom programu ili na studijskim programima zajedničkog vijeća ukupan broj studenata upisanih na svim godinama studija jednog ciklusa studija najmanje 20 (dvadeset) studenata.
- (2) Izuzetno od stave (1) ovog člana Vijeće se može konstituisati i ako je upisano manje od 20 (dvadeset) studenata ukoliko NNV/UNV fakulteta/akademije navede opravdane razloge i dobije saglasnost Senata. Za univerzitetske studijske programe odluku donosi Senat Univerziteta.

Član 7.
(Nadležnosti Vijeća)

(1) Vijeće studijskog programa ima sljedeće nadležnosti:

- a) donosi poslovnik o radu Vijeća;
- b) predlaže NNV/UNV-u nastavne planove i programe, projekte iz oblasti naučnoistraživačkog/umjetničko-istraživačkog rada, studijske kapacitete i upisne kvote;
- c) predlaže NNV/UNV-u, putem prodekana za nastavu i studentska pitanja, osnove plana pokrivenosti nastave na svim ciklusima studija;
- d) vodi rasprave o stručnim pitanjima koja se tiču rada studijskog programa, te mišljenja, stavove i prijedloge dostavlja NNV/UNV-u;
- e) predlaže sastav stalnih i ad hoc tijela, koja imenuje NNV/UNV i dekan fakulteta/akademije;
- f) vrši i druge nadležnosti u skladu sa Statutom i općim aktima Univerziteta.

(2) Vijeće svoje odluke donosi javnim glasanjem, osim za ona pitanja za koja je Statutom ili drugim općim aktom, utvrđeno da se odlučuje tajnim glasanjem.

Član 8.
(Šef studijskog programa)

(1) Vijećem rukovodi šef studijskog programa.

(2) Šefa studijskog programa imenuje i razrješava dužnosti Senat Univerziteta na prijedlog rektora uz konsultacije sa dekanom, na period od 4 (četiri) godine, iz reda nastavnika izabranih u naučno nastavna, odnosno umjetničko-nastavna zvanja, koji su u radnom odnosu na Univerzitetu s punim radnim vremenom. Izuzetno od navedenog šef studijskog programa na Medicinskom fakultetu može biti osoba koja je u radnom odnosu na Univerzitetu sa minimalno 20 % radnog vremena.

(3) Ista osoba se može imenovati na dva uzastopna mandata.

(4) Za svoj rad šef studijskog programa odgovara dekanu, rektoru i Senatu Univerziteta.

(5) Mandat šefa studijskog programa prestaje u slučaju isteka vremena na koje je isti imenovan.

(6) Na obrazložen prijedlog rektora Senat Univerziteta može i prije vremena razriješiti šefa studijskog programa o čemu se donosi posebna odluka.

Član 9.
(Djelokrug rada šefa studijskog programa)

Šef studijskog programa obavlja sljedeće poslove:

- a) utvrđuje dnevni red sjednica Vijeća;
- b) predsjedava sjednicama Vijeća;
- c) predlaže Vijeću mjere za efikasno vršenje njegovih nadležnosti i unaprjeđenje njegovog rada;
- d) provodi odluke Vijeća;
- e) prethodno razmatra molbe studenata koje se odnose na optimalno odvijanje nastavnog procesa na studijskim programima, u skladu sa zakonom, Statutom i drugim općim aktima Univerziteta;
- f) pomaže u radu dekanu, prodekanima i šefovima katedri;
- g) aktivno učestvuje i koordinira promotivne aktivnosti vezano za studijski program;

- h) koordinira, u saradnji sa prodekanom za nastavu i studentska pitanja, organizaciju gostujućih predavanja i predavanja na stranom jeziku;
- i) učestvuje i koordinira u postupcima inoviranja i akreditacije studijskog programa, kao i realizacije aktivnosti implementacije preporuka akredacione komisije koje se odnose na studijski program;
- j) učestvuje u izradi interne evaluacije stanja;
- k) provodi aktivnosti predstavljanja izbornih predmeta studentima;
- l) obavlja i druge poslove, u skladu sa Statutom, općim aktima Univerziteta, poslovníkom o radu Vijeća i nalogima dekana.

Član 10. **(Sjednice Vijeća)**

- (1) Sjednice mogu biti redovne i vanredne.
- (2) Sjednice Vijeća se mogu održavati i elektronskim putem.
- (3) Šef studijskog programa saziva sjednicu Vijeća na vlastitu inicijativu i po prijedlogu većine članova Vijeća.
- (4) Sjednicom predsjedava šef studijskog programa.
- (5) Poziv za sjednicu u pravilu se dostavlja u pismenoj formi najkasnije 5 (pet) dana prije održavanja sjednice, ukoliko nije riječ o vanrednoj sjednici.
- (6) Odluke na sjednicama se donose većinom glasova.
- (7) Na sjednicama se vodi zapisnik.
- (8) Sjednice Vijeća se održavaju prema potrebi.

POGLAVLJE III. Prelazne i završne odredbe

Član 12. **(Terminologija)**

Terminološko korištenje muškog gramatičkog roda u ovom Pravilniku odnosi se i na ženski gramatički rod.

Član 13. **(Stupanje na snagu Pravilnika)**

Ovaj Pravilnik stupa na snagu osmog dana od dana objavljivanja na oglasnoj tabli i *web*-stranici Univerziteta.

Član 14. **(Tumačenje Pravilnika)**

Tumačenje ovog Pravilnika daje Senat Univerziteta.

Član 15. **(Završne odredbe)**

Sva vijeća dužna su donijeti i uskladiti svoje poslovničke o radu sa ovim pravilnikom u roku od 60 dana.



Zamjenik Predsjedavajućeg Senata

Prof.dr. Muharem Adilović

Broj: 01-02-5-2181/26

Zenica, 24.06.2026. godine